

Tinan ida ne'e, hamutuk ho oratorianu sira, ita sei hala'o buat ne'ebé Reitór Mor propoin ba Família Saleziana ho estilu ne'ebé oratóriu favorese.

Ita-nia objetivu mak: "hodi celebra tinan 200 husi Dom Bosco nia moris, ita kontinua ninia misaun iha maluk sira leet"; loloos Reitór Mor ko'alia kona ba foin-sa'e sira, maibé ita-nia labarik, preadolexente no adolexente sira bele hala'o Maromak nia misaun iha sira-nia kolega leet hamutuk ho Dom Bosco no hodi tuir Dom Bosco nia estilu.

Tan ne'e, momentu ida-idak nia título hahú ho "Hamutuk ho Dom Bosco...", hodi espresa ambiente salezianu ida nia estilu, hafoin sei tuir objetivu ba tempu ida-idak. Iha subsidiu ne'ebé oratóriu sira sei simu, bele hetan ikone saleziana ida (Dom Bosco nia istória ka nia mehi sira), katekeze kona-ba haklaken Evanjellu, tanba ita la haluha katak tinan ida ne'e ita celebra tinan 500 evangelizasaun nian iha Timor Leste, Lectio ida Jogu ida no celebraun ka orasaun ida. tinan ida ne'e, iha subsidiu, sei la hakerek kona-ba atividade ka filme tanba iha parokia no comunidade ida-idak iha ona proposta barak, nune'e la lika aumenta tan!



ITA SEI DESKOBRE SANTIDADE SALEZIANA

Durante fulan Janeiru no Feveireiru, molok Kuarezma, ita celebra santu salezianu balun hamutuk ho Dom Bosco no S. Francisco de Sales ne'ebé sai inspiradór ba Dom Bosco nia atividade no espiritualidade. Hodi hateke ba sira-nia esperiênsia, oinsá sira tuir Dom Bosco nia ain, ita bele aprende atu sai Dom Bosco nia oan loos sira, no ita bele deskobre Maromak nia bolun iha ita-nia moris.

IKONE

Iha loron 29 Outubru 1972, bainhira Amo Papa Paulo VI proklama Miguel Rua beatu, nia dehan nune'e: "Don Rua mak Dom Bosco nia oan ne'ebé fiel liu, haraik an liu, maibé mós aten-barani liu". Nia mós dehan: "Don Rua la'ós de'it Dom Bosco nia saseluk, nia mak oan, dixipulu, imitadór, ida ne'ebé kontinua Dom Bosco nia obra sira".

Bua hotu hahú bainhira Miguel nia tinan 8. Dala barak Dom Bosco fahe medalla ba labarik sira, nune'e, Miguel mós hakbesik Dom Bosco, hamutuk ho kolega sira. Miguel mak oan kiak, nia apa mate ona no nia inan kesi hena metan boot iha ninia faru. Bainhira Miguel lolo nia liman loos atu simu medalla, Dom Bosco lolo nia liman karuk, no ho liman loos Dom Bosco halo asaun hanesan tesi nia liman hodi fahe ba rua; no mós Dom Bosco dehan ba Miguel, ne'ebé hateke ba nia ho matan hakfodak: "Foti bá, Miguelinho! Foti bá!" Hafoin nia hateten liafuan ruma ne'ebé marka Miguel Rua nia moris ba nafatin: "Ita na'in rua sei fahe buat hotu" (ita na'in rua sei halo sorin-sorin ho buat hotu?). Husi momentu ida ne'ebá, sei hahú duni servisu hamutuk entre Dom Bosco no Miguel Rua ne'ebé sei ba oin to'o Dom Bosco nia mate.

Loron 3 outubru 1852, Dom Bosco lori foin-sa'e sira ba paseiu no iha kolega sira nia oin, Dom Bosco halo Miguel hatais batina nu'udar seminarista ida; Miguel nia tinan 15.

Bainhira sira fila ba uma, Miguel hakbesik Dom Bosco no, hodi manán nia mo'e, nia husu: "Amo, sei hanoin bainhira ami hasoru malu ba dala uluk? Ha'u husu medalla ida ba Amo, no Dom Bosco halo sinál ida mai ha'u, hanesan Dom Bosco hakarak ko'a amo nia liman no dehan: "Ita na'in rua sei fahe buat hotu"? amo hakarak dehan sa loos? Dom Bosco simu hodi dehan: "Miguel doben, ó seidauk komprende? Buat ne'e klaru liu! Hodi la'o ba oin ó sei komprende di'ak liután buat ne'ebé ha'u hakarak dehan: iha moris ida ne'e, ita na'in rua sei fahe buat hotu: terus, responsabilidade, ksolok, no buat seluk tan; buat hotu sei sai komun ba ita na'in rua". Miguel rona ho nonok, maibé iha ninia laran, Miguel haksolok liu: ho liafuan simples hirak ne'e, Dom Bosco hili nia atu moris besik Dom Bosco no sai ninia saseluk universál.



Pergunta atu halo oratorianu sira reflete:

- ⇒ Dom Bosco sai Maromak nia mediatór atu halo miguel Rua komprende Maromak nia bolun no ninia misaun: iha ema ruma ne'ebé tulun ha'u atu komprende Maromak nia planu iha ha'u-nia moris?
- ⇒ Oinsá, oras ne'e, ha'u bele "kolabora" ba Dom Bosco nia misaun iha rai Timor?

Nu'udar preparasaun jogadór nian, la bele fó ba sira pergunta ho resposta atu dekor, maibé fó surat tahan ida ho santu 4 ne'e nia moris, atu sira bele aprende buat ruma jerál kona-ba santu sira ne'e.

Prepara kuadru ida hanesan ida ne'ebé tuir mai no forma grupu 3 ho ema na'in 5 ba grupu ida-idak. Dada rifa atu hatene grupu ida ne'ebé sei hahú no grupu ida ne'ebé tuir.

10	10	10	10
20	20	20	20
30	30	30	30
40	40	40	40
50	50	50	50

Grupi ne'ebé hahú husu pergunta ne'ebé nia hakarak; ez: grupu hili *Dom Bosco* 20 no animadór sei lee pergunta ne'ebé refere ba valór ida ne'e. Se grupu hatán, sei manán pontu 20, no iha direitu atu hili dala ida tan, se la hatene ka sala, grupu seluk bele hatán no ida ne'ebé fó resposta loos iha direitu atu kontinua husu ba pergunta seluk. Bainhira iha DB, ne'e vale hanesan Jolly, katak la iha pergunta, maibé manán kedas valór ne'ebé hili.
(Se iha projetór, iha website Inspetoria FMA nian bele hetan PPT interativu)

	DOM BOSCO	LAURA VICUNA	EUSEBIA PALOMINO	S. FRANCISCO de SALES
10	DB	Nia inan nia doben nia naran sa? (<i>Manuel Mora</i>)	Nia moris iha ne'ebé? (<i>España</i>)	Nia sai Bispo iha sidade ida ne'ebé? (<i>Geneva</i>)
20	Bainhira sei eskola, nia hari'i Siosiedade ida ne'eb'e ho ninia kolega sira? (<i>Siosiedade Alegria/ksolok nian</i>)	DB	Molok tama iha Institutu nia hala'o servisu sa de'it? (<i>hemos ema seluk nia uma</i>)	Bainhira nia tinan 15, nia família haruka nia atu estuda iha ne'ebé? (<i>Paris</i>)
30	Bainhira foin to'o Torino nia tulun don Cafasso iha ne'ebé? (<i>iha kadeia ba foin-sa'e sira</i>)	Sa tinan Amo Papa João Paulo II proklama nia Beata? (<i>1988</i>)	Nia oferese nia moris atu soi español nia klamar sira husi saida? (<i>funu entre maun-alin</i>)	Tansa Dom Bosco hili nia nu'udar padroeiru ba Kongregasaun Saleziana? (<i>tanba nia mak haklaken domin ho laran midar nian no santidade lora-lora nian</i>)
40	Dom Bosco moris iha ne'ebé no ba estuda iha ne'ebé? (<i>Becchi, Castelnuovo, Chieri</i>)	Nia moris iha nasaun ida ne'ebé no mate iha nasaun ida ne'ebé? (<i>Moris iha Chile, mate iha Argentina</i>)	DB	Nia hari'i kongregasaun feminina ida hamutuk ho se? (<i>Joana de Chantal</i>)
50	Dom Bosco hasoru Amo Papa na'in rua: sira-nia naran sa? (<i>Pio IX, Leone XIII</i>)	Laura nia konfessor naran sa? (<i>padre Crestanello</i>)	Ir. Eusebia nia naran kompletu oinsá? (<i>Ir. Eusebia Palomino Yenes</i>)	DB

SELEBRASAUN

Bele prepara logu tinan ida ne'e nian (Hamutuk ho...) iha surat-tahan boot no tau iha oin.

G: Jezús dehan katak ita bele rekoñese ai-hun ida husi ai-fuan ne'ebé nia halo; tinan ida ne'e ita selebra Dom Bosco nia moris nia aniversariu no se ita hateke ba mundu salezianu, ita deskobre katak ai-hun ida ne'e fó ai-fuan barak tebes! Ho orasaun ida ne'e ita hakarak hahú ita-nia selebrasaun sira ba Dom Bosco, no, liuliu, ita hakarak husu ba Maromak atu tulun ita hodi hatudu dalan loos ne'ebé Nia prepara ba ita ida-idak. Selebra Dom Bosco nia moris konvida ita ida-idak atu deskobre oinsá ita bele partisipa ba Dom Bosco nia misaun hodi lori Jezús ba ita-nia maluk sira.



Kantu: ba Dom Bosco

L: Jezús dehan: “Tebes, tebes, Ha'u dehan ba imi: trigu musan ne'ebé monu ba rai la mate karik, nia hela mesak; maibé mate karik, nia fó fulin barak. Ema ne'ebé hadomi nia moris, sei lakon nia moris ne'e; ema ne'ebé hewai nia moris iha mundu ne'e sei rai hela nia ba moris rohan laek. Ema ne'ebé serbí Ha'u, sei tuir Ha'u; no iha fatin ne'ebé Ha'u hela, Ha'u atan mós sei hela ne'ebá. Ema ne'ebé serbí Ha'u, Ha'u Aman sei hahi nia.”

G: Iha momentu ida ne'e, ida-idak bele espresa ninia agradesimentu ba ema ruma ne'ebé tulun Nia atu hasoru Jezús, ba ema ruma ne'ebé, hanesan Dom Bosco, hewai ninia moris atu serbí maluk sira no sira ne'ebé presiza.
(Kada orasaun 3, bele hananu refrain ida agradesimentu nian.)

G: Maromak kontinua bolu ema laran luak ne'ebé prontu atu haklaken Ninia Evanjellu; ita agradesi Nia tanba Nia tau matan ba ita ida-idak no konvida ita atu serbisu hamutuk ho Nia:

H: Na'i, ha'u agradesi Ita tanba Ita halo ha'u moris iha mundu ida ne'e. Ita bolu ha'u ho ha'u-nia naran rasik no Ita hakarak katak ha'u kolabora ba Ita-nia planu salvasaun nian. Ha'u hakarak tuir Ita no servisu hamutuk ho Ita, tanba ha'u hatene katak ho Ita de'it ha'u sei hetan ksolok. Book ha'u-nia fuan, halo ha'u-nia moris sai moos atu ha'u bele fó sasin kona-ba Ita-nia domin iha ha'u-nia família, iha eskola, iha oratóriu no fatin hotu iha ne'ebé ha'u hela ba. Ha'u hakarak tuir Ita hodi sai santu. Ha'u promete katak ha'u sei la'o hamutuk ho Ita nafatin. Na'i, hametin promesa ne'ebé ha'u hakotu ona ho Ita-nia kbiit.

(hananu knananuk ida no oratorianu ida-idak ba asina dezeńu ho motu tinan ida ne'e nian: bele prenxe fatin mamuk entre liafuan sira no Dom Bosco nia dezeńu)

G: Foin-sa'e sira ne'ebé moris hamutuk ho Dom Bosco hateten katak Dom Bosco mak Aman Maromak nia ilas no hatudu ba sira domin apa nian. Ita husu ba Aman Maromak atu tau matan ba ita nafatin no haraik mai ita ema ne'ebé bele sai ninia ilas iha ami leet.

AMI AMAN (hananu)